

BOSNA I HERCEGOVINA
Federacija Bosne i Hercegovine
Tuzlanski kanton
OPĆINA GRAČANICA
OPĆINSKO VIJEĆE

Broj predmeta: 01-05-02112-2018
Broj akta: 01EN-001
Gračanica, 21.6.2018.godine

Z A P I S N I K
SA 19. SJEDNICE OPĆINSKOG VIJEĆA GRAČANICA

Održane dana 30. 05. 2018. godine u sali za sjednice nove zgrade Općine Gračanica sa početkom u 10,00 sati.

Početu sjednice je prisustvovalo je 25 članova Općinskog vijeća Gračanica.

Odsutni su bili: Pjanić Safet, Hadžić Mirsad, Gadžić Rahim, Dedić Dino i Ahmetović Halid.

Sjednicu je otvorio i istom predsjedavao Nihad Krajinović Predsjedavajući Općinskog vijeća Gračanica, zajedno sa zamjenikom Devedžić Almedinom i sekretarom Dženanon Tukulj.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Općinskog vijeća sjednici su prisustvovali i Općinski načelnik, Općinski pravobranilac, šefovi Službi za upravu, članica Etičke komisije, izvjestioci po pojedinim tačkama dnevnog reda, te predstavnici sredstava informisanja.

Zapisnik sa 18. Sjednice Općinskog vijeća Gračanica održane dana 27.4.2018.godine usvojen je jednoglasno.

Predsjedavajući Općinskog vijeća Gračanica je elaborirao prispjele odgovore na vijećnička pitanja i inicijative:

Na posljednjoj 18. Sjednici OV Gračanica upućena su 4 pitanja i 8 inicijativa.

Pristigli odgovori su slijedeći :

- Vijećnica **Mirela Trepanić** uputila je inicijativu rješavanje problema odlaganja smeća i otpada od strane trećih lica u blizini zgrade „Alhos“. Nešto opširniji odgovor dostavljen je iz JP „Komus“ u kojem su date upute i pojašnjenje kako rješiti ovaj problem u koji se svakako stanari moraju aktivnije uključiti.
Pitanje koje je vijećnica Trepanić uputila odnosilo se na dostavljanje informacija o utrošku sredstava iz budžeta općine raspoređenih članom

19. stav 1. U odgovoru općinskog načelnika dostavljena je tražena informacija.

- Vijećnik **Fadil Mešić** uputio je inicijativu da se krene u određivanje koridora za izgradnju zaobilaznice oko Gračanice. Sefica nadležne službe Aida Hodžić dala je usmeni odgovor na istoj sjednici kazavši kako trasa postoji u ranije izrađenom dokumentu te da je taj pojas zaštićen od gradnje.
- **Vahidin Smajlović** inicijativom je pozvao na postavljanje saobraćajnog ogledala u ulici Viteška kod bolnice. Stigao je odgovor kako je nabavka ogledala u toku, ali prema saznanjima u međuvremenu je isto i postavljeno.
- **Demir Milkić** uputio je 2 inicijative i to za osnivanje Fonda za mobilnost mladih općine Gračanica na što odgovor nije stigao, te postavljanje znakova ograničenja brzine u ulici Sarajevska. Za drugu inicijativu stigao je odgovor nadležne službe na koji način je regulisan saobraćaj u ovom naselju tj. šta bi eventualno trebalo raditi da se stanje popravi. Na pitanje naknade za oboljele od celijaklije iz Centra za socijalni rad su odgovorili kako je pravo propisano i kako se ono primjenjuje.
- **Mirsad Čamdžić** upitao je hoće li ove godine biti izgrađen kružni tok kod bolnice te dovršena sportska dvorana „Bazen“. U pristiglom odgovoru iz kabineta načelnika općine navedeno je obećanje jedne te pesimizam druge kantonalne vlasti. No to nas ne smije obeshrabriti te općina nastoji pronaći konačno rješenje oba projekta.
- Vijećnik **Edin Ibrišević** podnio je inicijativu o izradi tabli zabrane nomađenja na općini Gračanica. Na osnovu navedenih članova zakona koji uređuju ovu oblast, šef inspektorata u općini Gračanica smatra, da se i pored odnosa vrijednog pažnje ne može postupiti zbog nedostataka pravnog osnova za istu, te da je isključiva nadležnost kantonalni nivo vlasti.
- **Edin Šehić** uputio je inicijativu i postavio pitanje koji su usko vezani i odnose se na utrošak sredstava iz budžeta općine na uređenje izletišta Vis, odnosno unapređenje uslova boravka na izletištu. Pristigli su odgovori iz dvije nadležne službe u kojima su dati precizniji podaci.
- Jedino odgovor nije stigao na inicijativu Halida Ahmetovića upućenu Direkciji cesta TK. No obzirom na iskustvo, odgovor se može očekivati naredni mjesec, a u prilog tvrdnji su i pristigli odgovori na inicijative sa martovske sjednice.

- JP Ceste FBiH uputile odgovor Ahmetu Šakušiću na inicijativu završetka trotoara na ulazu u Pribavu, kako nisu u 2018. predviđena sredstva za isti. Druga inicijativa glasila je na regulisanje saobraćaja u pojasu tržišnog centra s akcentom na prelaz za pješake. U odgovoru je navedeno kako postoji pješački prelaz na semaforima ali da prilikom nekontrolisanog prelaza pješaka preko mag. ceste, nadležnost ima MUP. Stigao je odgovor i na inicijativu vijećnika Devedžića za rekonstrukciju niskonaponske mreže u Lukavici. Iz Elektroprivrede navode kako su poduzete aktivnosti u cilju rješavanja ovog problema a napominju kako se već radilo na drugim vodovima u ovoj MZ. Vijećnici Alen Mujić i Edin Šehić na prethodnim sjednicama uputili su pitanja JZU Opća bolnica „dr. Mustafa Beganović“ po pitanju primjene sistematizacije i zapošljavanja u ovoj ustanovi, te kvalitete zdravstvenih usluga. Iz ove ustanove dostavljen je nešto opširniji odgovor u kojem se između ostalog akcentira rad u skladu sa važećim zakonskim propisima“.

Nova pitanja i inicijative kandidovali su:

Trepanić Mirela:

“Ja imam inicijativu u ime Komisije za obrazovanje, kulturu, sport, mlade i odnose sa vjerskim zajednicama. Na osnovu programa rada komisije, u planu aktivnosti koje se odnose na obrazovanje, komisija je u ponedjeljak 28.05.2018.godine posjetila područne škole u Vranovićima, Škahovici i Piskavici kako bismo utvrdili uvjete rada, s obzirom da smo imali informacije o problemima koji se tiču uvjeta za rad ovim školama.

Iako je obrazovanje u nadležnosti Kantona, lokalna zajednica može pomoći da se uvjeti rada u ovim školama poboljšaju tako što će sredstva koja dolaze sa viših nivoa vlasti, te sredstva općine usmjeravati na rješavanje njihovih problema.

1. Komisija se uvjerila da je u školi u Vranovićima hitno potrebna termo izolacija, čiji predračun iznosi 23.206,23 KM, a školi u Škahovici gorući problem je dotrajala stolarija-prozori koji se ne smiju otvarati da ne bi povrijedili ili još gore usmrtili nekoga, te ulazna vrata koja ako se jače povuku otvaraju se bez ključa (PREDRAČUN 19.482,00 KM).

2. Za školu u Piskavici koja koristi prostorije MZ Piskavica, prijedlog komisije ide prema projektnom timu pri kabinetu načelnika, da u saradnji sa Vijećem MZ Piskavica izradi projekat obnove objekta, jer smo se uvjerili da je objekat vrijedan kako za obrazovanje tako i za kompletnu zajednicu. Problemi ovog prostora su brojni: krov prokišnjava, prostorijama se širi miris vlage i mema, u učionicama pored klupa su peći za loženje...

3. Da se svim učenicima generacije 9 osnovnih škola na općini Gračanica dodijeli ista novčana nagrada, koja se po informacijama kojim raspolažemo do sad dodjeljivala samo učenicima generacije O.Š. Hasan Kikić i Druge O.Š.

U prilogu su predmjeri i predračuni ovih radova”.

Edin Ibrišević:

“Ja za današnju sjednicu imam dva vijećnička pitanja:

Prvo pitanje postavljam nadležnoj općinskoj službi i inspekciji, da li je izvršen popis i premjer parcela koje se vode u katastru Općine Gračanica, a koje su prilikom posljednjeg ekološkog incidenta onečišćene poplavom?

OBRAZLOŽENJE:

Popis parcela koje su onečišćene poplavom od 27.04.2018.godine i u danima nakon toga je neophodan kako bi vlasnici navedenih parcela bili upoznati da na njima ne mogu uzgajati poljoprivredne kulture, a samim tim i ne ugrožavati zdravlje ljudi i životinja koje bi konzumirale poljoprivredne proizvode uzgojene na tim parcelama.

Drugo pitanje je:

Kao općinski vijećnik zamoljen sam od grupe građana koji su skupili dio novca za izgradnju puta da pitam Općinskog načelnika, kada će se krenuti sa realizacijom Budžetske stavke 821 612 Sanacija puta u MZ Stjepan Polje - Grič?. Obrazloženje nije potrebno”.

Osman Sulejmanović:

“Ja za današnju sjednicu imam dvije inicijative:

Prva je upućena putem Općinskog vijeća upućena je JP “ELEKTROPRIVREDA” BiH “ELEKTRODISTRIBUCIJA” TUZLA.

Pozivam nadležno JP da pokrene inicijativu za kvalitetnije snabdijevanje Gračanice električnom energijom. Naime od 2014.godine i poplava koje su se desile u Gračanici postoji problem sa snabdijevanjem električnom energijom. Glavna trafostanica je u plavnom području a i stanje distributivne mreže nije zadovoljavajuće. Ovaj problem posebno se pojavio u Radnoj-industrijskoj zoni gdje se intenzivno grade privredni objekti i postao je kamen spoticanja u razvoju.

Gračanica kao privredno razvijena općina treba i zaslužuje kvalitetnije snabdijevanje elektro energijom i bez zastoja kako za privredu tako i za domaćinstva.

Moja druga inicijativa upućena je Općinskom načelniku i nadležnoj službi. Molim načelnika i nadležnu službu da po hitnoj proceduri započne realizaciju projekta “PROTIVGRADNA ODBRANA”.

Obrazloženje:

Već duži vremenski period u Općinskom budžetu rezervišemo sredstva za projekat PROTIVGRADNE ODBRANE, a isti se ne realizuje. U posljednje vrijeme trpimo velike štete u voćarstvu, poljoprivredi i na objektima koje prouzrokuju padavine grada. Ne znam da li su rezervisana sredstva dovoljna, ali tražim da se pokrenu procedure nabavke i instalisanje opreme”.

Šakušić Ahmet:

“Ja imam jednu inicijativu za danas:

Upućujem inicijativu Općinskom Načelniku da odobri pomoć u novcu za uređivanje mezarja u džematu “Golaći.

OBRAZLOŽENJE:

Džematski odbor džemata “Golaći” je pokrenuo akciju na uređenju mezarja. Prikupljena su određena novčana sredstva od dobrovoljnih priloga džematlija i drugih donatora, međutim nedovoljna da se u potpunosti završi uređenje mezarja. Džemat “Golaći” je najmlađi i vjerovatno po broju članova i najmanji džemat na prostoru općine Gračanica. Ovim putem upućujem inicijativu Općinskom načelniku da odobri novčanu pomoć kako bi se radovi priveli kraju i omogućilo se normalno obavljanje vjerskih obreda u pomenutom džematu.

Napominjem načelnika da su budžetom za 2018. godinu planirana novčana sredstva za održavanje mezarja i groblja pod ekonomskim kodom 613727 pozicija 3 u iznosu od 2.000 KM”.

Alen Ibrišević:

“Za današnju sjednicu ja imam tri vijećnička pitanja:

Pitanje upućujem Općinskom načelniku, mada znam da ovo nije u njegovoj nadležnosti ali on će najbolje odgovoriti i znati, a to je ko je nadležan za kažnjavanje kladionica u kojima se vrši primanje uplata od lica koja su mlađa od 18 godina?

Drugo pitanje vezano je za ovo prvo pitanje:

Pitanje upućujem nadležnoj inspekciji: Koliko je u 2017. godini na području Općine Gračanica izvršeno inspekcijskih kontrola, te koliko je izdato prekršajnih naloga protiv kladionica u kojima su zatečena lica mlađa od 18 godina, te koliki je iznos naplaćenih kazni po ovom osnovu za 2017. godinu?

OBRAZLOŽENJE:

Poznato je da su kladionice veliko zlo današnjice u kojima veliki broj ljudi troši ogroman novac nadajući se eventualnom dobitku. Svi smo svjedoci da je veliki broj kladionica locirano u blizini škola, te da veliki broj maloljetnih lica svakodnevno ulazi u njih, te koristi usluge kladionica. Prema članu 5. Zakona o igrama na sreću F BiH zabranjeno je zaprimanje uplata, te učestvovanje u igrama na sreću osobama mlađim od 18 godina. U dijelu kazne odredbe ovog zakona propisane su kazne za kladionice kao i za maloljetna lica koja krše pomenuti član zakona. Iz svega navedenog molim nadležnu inspekciju da mi dostavi tražene podatke.

Treće pitanje je isto kao i od kolege Sulejmanovića, ali ću ga pročitati:

Pitanje upućujem Općinskom načelniku, kada će se realizovati ekonomski kod 821361 protivgradna zaštita?

OBRAZLOŽENJE:

U proteklih mjesec dana Općinu Gračanica je 4 puta pogodilo veliko nevrijeme praćeno gradom. Posebno velike štete je pričinio grad koji je prošlu sedmicu pogodio MZ Stjepan Polje. Poljoprivredni usjevi te nasadi voća su prilikom ovog nevremena potpuno uništeni i poljoprivrednici su dovedeni do kolapsa. Kako sam upoznat nabavka protivgradne zaštite je planirana budžetom za 2016, 2017 i 2018. godinu, međutim ni nakon tri godine ovaj projekat nije realizovan. I druge kolege vijećnici su ranije postavljali slična pitanja, te je odgovor uvijek bio da je nabavka u proceduri. Molim načelnika da mi odgovori dali će ova procedura ikada biti završena, te dali će za ovoga mandata Vijeća zaživiti ovaj važan projekat za sve građane naše općine”.

Hasić Ibrahim:

“Ja imam jedno vijećničko pitanje, a ono je naslovljeno direktoru Elektrodistribucija Tuzla:

Mjesna zajednica Malešići u mjesecu maju ove godine imala je više dužih prekida u napajanju strujom, od čega je prekid drugog na treći maj trajao 18 sati.

Isti ili sličan problem imaju i druge mjesne zajednice na području Općine. Na prigovor koji smo u vezi ovoga uputili Elektrodistribuciji Tuzla, dobili smo odgovor kojim nismo zadovoljni. Između ostalog, oni nas u tom odgovoru podučavaju da u slučaju nestanka struje, treba da imamo uređaj za besprekidno napajanje-UPS. Zbog toga, sada putem Općinskog vijeća, od direktora Elektrodistribucije Tuzla tražimo konkretne odgovore na slijedeća pitanja.

1. Kako ste organizovali rad na ovom području, van redovnog radnog vremena?
2. Zbog čega se radovi na popravci kvarova prekidaju i kada su vremenski uslovi povoljni, kao što je to bio slučaj 2. Maja ove godine.
3. Šta je razlog da vaša firma ne pruža zadovoljavajući nivo usluge građanima Općine Gračanica?
4. Šta ćete konkretno učiniti da se taj nivo usluge poboljša, izuzev što nas podučavate

da treba da imamo UPS? Opet agregat”.

Edin Šehić:

“Za današnju sjednicu imam tri vijećnička pitanja. U suštini oni su osvrst na odgovor kojeg sam dobio, od prošle sjednice Općinskog vijeća kada sam imao vijećničku inicijativu i vijećničko pitanje u vezi izletišta Vis, Sijedi Krš.

Prvo pitanje glasi:

Kada je planiran okvirni datum instalacije putokaza prema izletištu Vis - Sijedi Krš, te da li će Općina Gračanica plaćati svaki odvoz kontejnera sa otpadom sa izletišta Vis - Sijedi Krš u ljetnoj sezoni?

Obrazloženje:

Tragom odgovora na vijećničku inicijativu sa prošle sjednice Općinskog vijeća Gračanica, a u vezi unapređenja uslova posjete i boravka na izletištu Vis - Sijedi Krš, postavljam konkretno gore navedeno pitanje, jer nisam zadovoljan odgovorom, koji je poprilično diplomatski, bez konkretnih i jasno definisanih pokrenutih procedura od strane Općine Gračanica i njenih službi. Obzirom da već ulazimo u ljetnu sezonu, kada otpočinjemo i razne kulturno - sportske i zabavne manifestacije na navedenom izletištu (motorijada, razna sportska natjecanja i smotra folkloru u okviru manifestacije Dani Babića), a sve zbog velikog broja posjetilaca koji po prvi puta dolaze na izletišta, smatram da treba djelovati i prije samog odgovora na postavljena pitanja. Po ko zna koji put podvlačim da je ovo izletišta i ogledalo naše općine, i pozivam načelnika na čelu sa svim raspoloživim službama, gdje se i lično stavljam na raspolaganje, da uložimo maksimalne napore i promptno djelujemo na poboljšanje uslova i boravka na izletištu.

Drugo vijećničko pitanje je:

Na koji implementirani projekat je izvršena preraspodjela odobrenih grant sredstava Ministarstva TK u iznosu od 7.000 KM po osnovu zahtjeva općine od 03.04.2018.godine, a koja su prethodno planirana za izradu projekta uređenja izletišta Vis - Sijedi Krš, te zašto se ne provode zaključci komisije koja je radila na snimanju terena i davanju preporuka, odnosno projektnih zadataka?

Obrazloženje:

U odgovoru na vijećničko pitanje sa prošle sjednice Općinskog vijeća Gračanica, navedeno je, da je općina dobila odobrenje po osnovu zahtjeva od 03.04.2018.godine da može izvršiti preraspodjelu odobrenih sredstava za dodatno sufinansiranje na ime drugog implementiranog, a prethodno odobrenog projekta Ministarstva prostornog uređenja i zaštite okolice TK, čime tražim detaljniji odgovor na pomenuto pitanje. U odgovoru se takođe spominje da je projekat uređenja izletišta od važnosti za održivi razvoj šireg lokaliteta, a s druge strane ništa se ozbiljnije ne poduzima u postupcima da se to i dokaže kao tako, gdje već dvije godine lično iniciram određene stvari, kada je u pitanju navedeno izletišta, a veoma mali i usporeni pomak se osjeti na terenu. Da stvar bude gora, dobijam odgovor da su namjenska sredstva preraspoređena na drugi projekat, što još jednom dovodi u pitanje, koliko je zatim bitan projekat uređenja izletišta Vis-Sijedi Krš. Na našoj općini.

Treće vijećničko pitanje glasi:

U kojoj fazi su procedure oko implementacije projekata, usvojenih budžetom općine Gračanica za 2018.godinu, a tiču se MZ Babići?

Obrazloženje:

Budžetom općine Gračanica za 2018.godinu, planirani su projekti za MZ Babići:

Izgradnja trotoara na potezu područna škola Babići - Zvijezda, uređenje izletišta Vis-Sijedi Krš, rekonstrukcija puta Babići - Karići, asfaltiranje puta Borici - Babići, utopljanje područne škole Babići, te ulaganje u vodovod u MZ Babići, čime postavljam navedeno pitanje i tražim odgovor sa jasno definisanim postupcima koji su poduzeti, kao i planirani rok implementacije svakog projekta pojedinačno. Da li ima određenih zastoja u implementaciji projekata prouzrokovanih od strane V MZ Babići i drugih akata koji su aktivno uključeni u samu implementaciju projekata. Ovdje takođe smatram da će šef službe dostaviti ono što smo

usmeno dogovorili vezano za prošlo pitanje utroška sredstava 10.000 KM. Na koje tačno i zamolio bih ukoliko ima računa, koji su to tačno računi za uređenje izletišta od 10.000 KM”.

Džemal Jukan:

“Na osnovu ovih inicijativa i pitanja do sada, ja pokrećem jednu inicijativu za koju ne tražim odgovor. Ovo možemo shvatiti kao jedan prijedlog. Naime, mi smo u budžetu Općine Gračanica, za ovu godinu planirali dosta projekata, odnosno kapitalnih ulaganja po mjesnim zajednicama. Informacije kojim ja raspolažem da je do sada raspisano samo pet ili šest tendera. A evo sutra je šesti mjesec, odnosno polovimo godinu. Ako uzmemo da su zadnji mjeseci godine, nepovoljni za građevinske radove, a isto tako i prvi mjeseci u godini, znači odprilike mi bi sad trebali biti negdje na pola puta. Dolaze mjeseci godišnjih odmora da ne kažem ovo je izborna godina, nećemo moći sve strpati u deveti mjesec, pred izbore. Zato predlažem i evo iniciram da općinske službe raspišu sve tendere koje smo planirali u ovoj budžetskoj godini, da se to blagovremeno pokuša uraditi, riješiti, da se ne dovedemo u situaciju kao prošle ili predprošle godine, te ne mogu izvođači da urade to sve što smo i njima dogovorili, nema slobodnih izvođača itd. Mislim da smo dosta zakasnili s tim, izgubili puno vremena i evo moja je samo inicijativa da ubrzamo to, da se ne bi u vremenu jesenskih mjeseci našli u cajtungu. Toliko”.

Nihad Krajinović:

“Upućujem inicijativu prema Direkciji cesta Federacije BiH ra regulisanje prilaza i ulaza u dvorište područne osnovne škole Donja Lohinja, vertikalnih i horizontalnih saobraćajnih znakova u blizini iste te dovršetak trotoara koji vodi iz mjesne zajednice prema školi.

OBRAZLOŽENJE:

Iako je to u više navrata činjeno iz ove institucije šaljem novi apel i poziv Direkciji cesta F BiH da se ozbiljnije i aktivnije uključi u rješavanje problema dolaska i odlaska učenika u područnu osnovnu školu Donja Lohinja u općini Gračanica.

Svjesni da se škola zapravo nalazi na lokaciji koja ne zadovoljava u potpunosti sigurnosne uslove za najmlađe učenike osnovne škole, mi građani općine Gračanica ustvari apelujemo da se ozbiljno shvati ovaj problem i riješe:

- trotoarom pješačka staza koja vodi duž magistralne ceste Doboj-Tuzla u naseljenom mjestu Lohinja Donja do škole,
- pješački prelazi i saobraćajni znaci na preglednijem mjestu,
- ulaz za saobraćaj u krug škole kako bi autobusi nesmetano mogli dovoziti i odvoziti djecu i iz škole što bi djelimično riješilo gore navedene potrebe.

Ovu inicijativu upućujem u ime djece koja svakodnevno bivaju izložena frekventnom saobraćaju, u velikom broju i kamiona. Svaki spašen dječiji život vrijedniji je od ukupnih finansijskih potreba da se projekat u potpunosti završi.

I druga inicijativa je, ovo kako i kolega Jukan reče skoro smo na pola godine pozivam nadležne da aktueliziraju radove na projektu Ališevići, odnosno Bazeni III”.

Demir Milkić:

“Ja imam samo jedno pitanje za direktora BKC-a:

Postoji li mogućnost u ljetnoj sezoni organizovanje takozvanog “Drive In” Kina ili uopšte projekcije jednog od filmova na otvorenom u organizaciji BKC-a?”.

Općinski načelnik Nusret Helić odgovorio je sljedeće:

“Dat ću neke odgovore i neka pojašnjenja:

Prvo Mirela što je iznijela oko učenika generacije, nikad škole nisu dostavljale, a ove dvije škole dostave i mi zaista pratimo najbolje učenike. Ne samo učenike generacije, nego i one koji čitave godine postižu odličan uspjeh i drugo. Normalno da će se ispoštovati, samo na vrijeme neka se dostavi iz škola. Kad je u pitanju protivgradna odbrana, duboko smo u postupku. U slijedećoj sedmici imamo sastanak sa ovima koji su dobili tendere, predstavljanje projekta a onda idemo i na određivanje još par lokacija. Čuli ste da su uništene neke u onim elementarnim nepogodama tako da će ovaj projekat zaživjeti u periodu dok ste vi ovdje. Šalim se. Znači ide to, malo je zastalo, tri-četiri godine je već oko toga jer je složeniji dio postupka. Kružni tok, ja sam odgovorio Čamdžiću, ali evo da odgovorim spram informacija. Dakle, ponovo sam bio s direktorom i danas ili sutra treba da dođe sa ekipom da uđu na lokacije, završene su i građevinske dozvole i obećao je. I meni je zaista kao i vama svima drago da to ide. Oko onoga drugog mi krećemo sa 100.000, a moram da vam kažem da ni jedan zahtjev od škola nije otišao prema kantonu za sportsku salu, svo ovo vrijeme. Nadam se da će neko imati sluha za ovo, a mi idemo u procedure onoga za što imamo pare. Tenderi, ovo što Džemal predlaže a i ostali, idu po planu. Ja bih najsretniji bio da možemo raspisati sve, ali ja mogu raspisati kad su obezbijedene pare. Pola ovih tendera su vezani za odluke iz kantona. Dakle idemo s tim, krenulo se imamo preko 250 javnih nabavki. Završili smo pedeset sigurno, što manjih što nekih veći. Idu ali se rade po planu. Imamo jednu osobu koja radi, nemoguće, niti zakon dozvoljava da raspišete prije nego što imate sredstva, tako da ćemo se potruditi. I meni je zaista stalo. Ako se sjećate i govorio sam, volio bih završiti sve projekte prije izbora pa nek bude šta hoće. Ali objektivnih razloga ima da ne možemo sve puštati, ali evo svaki dan sad izlaze tenderi. Mi radimo po planu javnih nabavki koji je usvojen u februaru mjesecu i tačno se zna i kad budemo odgovarali na pitanje koji projekat kad ide. Nekad raspisujemo kad građani skupe prije sredstva skupiti, ali je zaista procedura takva. Evo toliko, a na ostalo ćete dobiti pismenim putem”.

Sjednici je pristupio Hadžić Mirsad pa je prisutno 26 članova Vijeća.

Hasan Puškar:

“Imam ja primjedbu. Postavio sam ja dvije-tri inicijative na zadnjih nekoliko pitanja, pa što vi rekoste, da li ću do kraja mandata ja doživjeti da se više saobraćajna signalizacija riješi u gradu. Svjedoci smo npr. neki dan da su semafori stali, tri nezgode za tri sata. Sve zbog neadekvatne saobraćajne signalizacije. Taj dio nije u našoj nadležnosti, međutim, ne može biti saobraćajni znak STOP mali 30-40 cm, a treba biti 90 i ljudi ne vide i dođe do nezgode. Kažem krajnje je vrijeme da se to riješi i što nije u našoj nadležnosti a i što jeste i krajnje je vrijeme da se krene u uređenje signalizacije. Druga primjedba je, pokrenuo sam inicijativu da se krene u sanaciju udarnih rupa po gradu. Ja još nisam vidio. Pola ljeta dođe a nije ni jedna sanirana. Ja nisam vidio a najgori nam je put od bolnice prema magistrali. To je trenutno najgori put u gradu. Krajnje je vrijeme da se krene u sanaciju i rekonstrukciju tog puta. I treće moja inicijativa je bila da se iskrči ograda gore prema Malešićima. I ja nisam vidio da je išta na tom planu učinjeno. Krajnje je vrijeme da se na tome nešto uradi da se ne dopisujemo ponovo. Ne znam ko je nadležan a od te tri stvari, znači saobraćajna signalizacija po gradu, sanacija udarnih rupa i da se ustvari i privatne i društvene površine malo saniraju. To je sve po metar na putu i direktno ugrožava saobraćaj a pješaci bježe i kad se desi nezgoda i neko nastrada, zna se ko je odgovoran. Znat će se kad neko pokrene na sudu. A sada da malo odgovorim Mireli za školu u Piskavici. Prije pet-šest godina Vlada TK, jer sam ja direktno pokrenuo inicijativu je uložila sredstva za izgradnju škole u Piskavici. Uložila sredstva za izgradnju temelja, međutim predsjednik tadašnji u V MZ nije dao da se urade temelji po projektu. Ministrica Mirzeta je bila obezbijedila i školu čak da se napravi, čini mi se Krivaja, Zavidovići. Ali tu je došlo do opstrukcije. Njima daje da prodaju taj prostor koji ne zadovoljava ni po kakvim kriterijima od MZ-a da naprave školu. I evo urađene su zidine, dvadeset-trideset

hiljada uloženo i nikad ništa dalje nije pokrenuto s mrtve tačke. Zato ja mislim da treba malo komunikacije lokalne zajednice i Ministarstva obrazovanja, da treba da se zna ko je titular. A ko je općina da općina vodi projekat, ako je Ministarstvo onda Ministarstvo vodi projekat. Ono je čisti promašaj, gdje tolike pare propadaju samo što neko nije dao a sredstva je uložio. I po meni je to dobro što obilazite škole i treba proširiti kako bi komisija obišla sve škole, jer i u Sokolu, centralna je škola a prozori zakovani ekserima ne mogu se otvoriti. Toliko”.

Zaključen je dio sjednice za vijećnička pitanja i inicijative i data pauza od deset minuta kako bi kolegij Vijeća održao sjednicu.

Nastavku sjednice prisustvuje 27 vijećnika. Na sjednicu došao i Halid Ahmetović.

Predloženi dnevni red je sa 15 tačaka dnevnog reda, ali kolegij Vijeća je predložio i neke izmjene, tako da se prešlo na raspravu o predloženom dnevnom redu.

Hasan Puškar predsjednik Komisije za propise i Statut kao predlagač, predlaže slijedeće:

“Da se druga tačka dnevnog reda povuče, a to je Razmatranje i usvajanje Odluke o izmjenama i dopunama Poslovnika Općine Gračanica. Razlog povlačenja je radi dorade i još nekih izmjena i dopuna. Dakle ili da napravimo narednu ili da to ostavimo za sledeću sjednicu a o tome neka se izjasni Općinsko vijeće. I predlažem dvije nove tačke pod 8 i 9, a to su Rješenje o razrješenju predsjednika stalnog radnog tijela Komisije za poljoprivredu i Rješenje o imenovanju novog predsjednika Komisije za poljoprivredu”.

Almedin Devedžić:

“Ja bih zamolio uvaženo Vijeće da izvršimo određene izmjene redoslijeda dnevnog reda tako da bi prva tačka koja je planirana za današnju sjednicu razmatranje i usvajanje prijedloga Odluke o dodjeli općinskih priznanja, da bude četvrta po redu. Znači samo prva tačka da se prebaci kao četvrta tačka dnevnog reda. Nadam se da će te uvažiti zbog nekih drugih stvari o čemu smo na kolegiju razgovarali a stvar je tehničke prirode”.

O povlačenju tačke 2 Vijeće se nije izjašnjavalo.

Dopuna dnevnog reda sa još dvije tačke dnevnog reda usvojena je jednoglasno.

Za izmjene redoslijeda tačaka dnevnog reda glasalo je 24 člana Općinskog vijeća, a 3 “SUZDRŽANO”.

Predsjedavajući Vijeća je predložio da Vijeće razmatra zajedno zbog povezanosti tačku 12 i tačku 14, a da se izjašnjava za svaku posebno.

Predsjedavajući Vijeća je pročitao dnevni red 19. Sjednice Općinskog vijeća Gračanica, koji glasi:

1. RAZMATRANJE I USVAJANJE ODLUKE O PRODAJI NEKRETNINA

Izvjestilac: Aida Hodžić, Šef Službe

2. RAZMATRANJE I USVAJANJE ODLUKE O ZAMJENI NEKRETNINA

Izvjestilac: Aida Hodžić, Šef Službe

3. RAZMATRANJE I USVAJANJE ODLUKE O DAVANJU SAGLASNOSTI OPĆINSKOM NAČELNIKU ZA KUPOVINU ZEMLJIŠTA.

Izvjestilac: Nusret Helić, Općinski načelnik

4.RAZMATRANJE I USVAJANJE PRIJEDLOGA ODLUKE O DODJELI
OPĆINSKIH PRIZNANJA

Izvjestilac: Hasan Puškar, Predsjednik Komisije

5.RAZMATRANJE I USVAJANJE PRIJEDLOGA PRAVILNIKA O USLOVIMA
ZA OBAVLJANJE POSLOVA UPRAVITELJA ZGRADA KOLEKTIVNOG
STANOVANJA S UPUTSTVOM O NAČINU PROMJENE UPRAVITELJA

Izvjestilac: Aida Hodžić, Šef Službe

6.DONOŠENJE RJEŠENJA O IMENOVANJU ČLANOVA NADZORNOG
ODBORA JP „KOMUS“ D.O.O. GRAČANICA

Izvjestilac: Nusret Helić, Općinski načelnik

7.DONOŠENJE RJEŠENJA O IMENOVANJU ČLANOVA NADZORNOG
ODBORA JP „VODOVOD I KANALIZACIJA“ D.O.O. GRAČANICA

Izvjestilac: Nusret Helić, Općinski načelnik

8.RJEŠENJE O RAZRJEŠENJU PREDSJEDNIKA STALNOG RADNOG TIJELA
OPĆINSKOG VIJEĆA GRAČANICA, KOMISIJA ZA POLJOPRIVREDU.

9.RJEŠENJE O IMENOVANJU PREDSJEDNIKA STALNOG RADNOG TIJELA
OPĆINSKOG VIJEĆA GRAČANICA, KOMISIJE ZA POLJOPRIVREDU.

10.RAZMATRANJE PRIJEDLOGA UGOVORA O REALIZACIJI PROGRAMA
RESURSNOG CENTRA ZA DJECU, MLADE I PORODICE I DAVANJE
SAGLASNOSTI ZA POTPISIVANJE ISTOG

Izvjestilac: Nusret Helić, Općinski načelnik

11.RAZMATRANJE I USVAJANJE IZVJEŠTAJA O RADU OPĆINSKOG
PRAVOBRANILAŠTVA ZA 2017.GODINU

Izvjestilac: Jasminka Imširović, Općinski pravobranilac

12.RAZMATRANJE I USVAJANJE IZVJEŠTAJA O PROVEDENIM
PODSTICAJNIM MJERAMA I NJIHOVIM EFEKTIMA U POLJOPRIVREDI
U 2017.GODINI NA PODRUČJU OPĆINE GRAČANICA.

Izvjestilac: Nermina Trutović, šef Odjeljenja

13.RAZMATRANJE I USVAJANJE IZVJEŠTAJA O RADU I FINANSIJSKOM
POSLOVANJU SA BILANSOM STANJA I USPJEHA, JP „KOMUS“ D.O.O.
GRAČANICA ZA 2017.GODINU.

Izvjestilac: Senad Memić, Direktor

14.RAZMATRANJE I USVAJANJE INFORMACIJE O RADU I VRŠENJU
NADZORA OPĆINSKE INSPEKCIJE ZA 2017.GODINU

Izvjestilac: Muhibija Memić, Glavni inspektor

15.INFORMACIJA O PRIKUPLJANJU I ODLAGANJU KOMUNALNOG
OTPADA IZ DOMAĆINSTAVA I PRIVREDNIH SUBJEKATA

Izvjestilac: Senad Memić, Direktor

16.INFORMACIJA O ZBRINJAVANJU NAPUŠTENIH I IZGUBLJENIH
ŽIVOTINJA (PASA LUTALICA) NA PODRUČJU OPĆINE GRAČANICA.

Izvjestilac: Aida Hodžić, šef Službe

Dnevni red je usvojen jednoglasno sa 27 glasova „ZA“.

TAČKA 1

RAZMATRANJE I USVAJANJE ODLUKE O PRODAJI NEKRETNINA

Nije bilo učesnika u diskusiji i Odluka o prodaji nekretnina je usvojena jednoglasno.

TAČKA 2

RAZMATRANJE I USVAJANJE ODLUKE O ZAMJENI NEKRETNINA

Nije bilo učesnika u diskusiji i Odluka o zamjeni nekretnina je usvojena jednoglasno.

TAČKA 3

RAZMATRANJE I USVAJANJE ODLUKE O DAVANJU SAGLASNOSTI OPĆINSKOM NAČELNIKU ZA KUPOVINU ZEMLJIŠTA.

Kratko obrazloženje po ovoj tački dnevnog reda dao je Općinski načelnik Nusret Helić:

„Poznato je da smo u maju 2014. godine pogođeni strašnom elementarnom nepogodom (poplavama, klizištima, gradom i drugim), tada nam je srušeno 50-ak stambenih objekata, 83 teško oštećeno, preko 650 poplavljeno, a više od 1.500 oštećeno od grada.

Brzo smo reagovali i na razne načine pomogli obnovi. Između ostalih smo kroz projekat „Program za oporavak od poplava - stambeno zbrinjavanje“ UNDP uz sufinansiranje općine izgradili 8 tipskih objekata u Lukavici. Ponovnom našom aplikacijom iz prošle godine u istom projektu UNDP-a – faza II uspjeli smo proći procedure, te nam je odobrena izgradnja 14 novih stambenih jedinica i sanacija 6 oštećenih stambenih objekata. Time gotovo zatvaramo projekat obnove stradalih objekata.

Naša je obaveza za svaki objekat vlastito učešće od po 5.000 KM i obezbjeđenje placeva za one koji nemaju iste ili na njihovim parcelama nije predviđena gradnja. Za pet aplikacija od ovih 14 valja obezbijediti zemljište za gradnju ili se gubi pravo na izgradnju i oni izlaze iz projekta. Dobro je da smo našli adekvatnu lokaciju - parcelu u Odluci stoji da je to u naselju Grabovac, za dosta povoljnu cijenu od 8.000 KM na kojem će se izgraditi 4 stambene jedinice. Prethodno je utvrđeno da je izgradnja dozvoljena.

Na ovaj način i kroz ovaj projekat građani će ne samo dobiti nove stambene jedinice, nego ulaze i u program ekonomskog osnaživanja porodice, gdje će im se pomoći pri zaposlenju ili razvoju i unapređenju poljoprivredne proizvodnje.

Ovo je prilika i da pohvalimo Komisiju koja je kvalitetno vodila postupak i saradivala sa UNDP-om, posebno Harisa Hrvica i Jukan Dijanu, bez čijeg ovakvog angažovanja ovo nebi uspješno prošlo.

Predlažem Vijeću da odobri kupovinu zemljišta“.

Nije bilo učesnika u diskusiji i Odluka o davanju saglasnosti Općinskom načelniku za kupovinu zemljišta je usvojena jednoglasno.

TAČKA 4

RAZMATRANJE I USVAJANJE PRIJEDLOGA ODLUKE O DODJELI OPĆINSKIH PRIZNANJA

Obrazloženje po ovoj tački dnevnog reda dao je Hasan Puškar predsjednik Komisije za propise i Statut, izbor i imenovanja, općinska priznanja i obilježavanje značajnih događaja i ličnosti:

„Komisija za propise i Statut, izbor i imenovanja, općinska priznanja i obilježavanje značajnih događaja i ličnosti je na vrijeme krenula sa procedurom. Raspisali smo poziv i razmatrali pristigle prijedloge. Na prošloj sjednici smo predložili Nacrt Odluke. Nakon nacрта, imali smo dva amandmana uložena, koja komisija nije prihvatila i danas je Općinskom vijeću uputila prijedlog Odluke o dodjeli Općinskih priznanja koja glasi:

Član 1.

Općinsko priznanje Zlatna plaketa dodjeljuje se:

1. „KOMUS“ d.o.o. Gračanica

2. „POLY“ d.o.o. Gračanica.

Član 2.

Općinsko priznanje Zlatna značka dodjeljuje se:

1. Sakić Azri

2. Adžemović Osmanu

3. Šerbečić Besimu.

Član 3.

Posebno općinsko priznanje Počasni građanin općine Gračanica, dodjeljuje se: Skalnik Jakub, Ambasador Republike Češke u BiH. To je komisija ponudila Općinskom vijeću i nada se da će biti prihvaćena“.

Sjednici je pristupio i Gadžić Rahim pa je na sjednici prisutno 28 članova Vijeća.

Učesnici u diskusiji su:

Vahidin Smajlović:

„Evo vezano za ovu tačku dnevnog reda, ja sam i na prošloj sjednici to rekao, Klub SDP-a se aktivno uključio oko općinskih priznanja i ja sada želim reći da smo mi davali neke prijedloge i sugestije. Evo komisija nije usvojila naš prijedlog kojeg smo imali, a mi u cilju da zaista ne politizujemo i ne pravimo neke dodatne smetnje, tako da smo mi u klubu odlučili da podržimo ovakav prijedlog Odluke. Smatram da su svi ovdje predloženi kandidati, zaslužili ta općinska priznanja. Oni su tu zato što su najbolji, oni su tu zato što su predlagani od nas, ali imamo limitiran broj priznanja i ne mogu znači svi da dobiju. Nadam se da ovi koji nisu ove godine dobili, mi ćemo nastojati da ih kandidujemo iduće godine i naravno neke druge ljude i kolektive koji to zaslužuju. Još jednom ja čestitam svima u ime Kluba SDP-a, koji su predloženi i Klub SDP-a će podržati ovu Odluku“.

Džemal Jukan:

„Evo obzirom da se Klub stranke za BiH izjasnio na prošloj sjednici, ja želim samo da se zahvalim i vijećnicima i klubovima koji su evo pristali i povukli amandmane koje su ulagali na Odluku i koliko znam i na kolegiju je ovo iskristalisano tako da bi trebalo biti jednoglasno i evo mi se pridružujemo i prihvatit ćemo ovo kako je predloženo“.

Almedin Devedžić:

„Evo ja ću kratko u ime Kluba SDA, ovu Odluku u ovom obliku će i vijećnici SDA podržati“.

Prešlo se na izjašnjavanje i Odluka o dodjeli općinskih priznanja je usvojena sa 26 glasova „ZA“, 1 „PROTIV“ i 1 „SUZDRŽAN“.

TAČKA 5

RAZMATRANJE I USVAJANJE PRIJEDLOGA PRAVILNIKA O USLOVIMA ZA OBAVLJANJE POSLOVA UPRAVITELJA ZGRADA KOLEKTIVNOG STANOVANJA S UPUTSTVOM O NAČINU PROMJENE UPRAVITELJA

Uvodno obrazloženje dala je Aida Hodžić, šef službe za upravu:

„Ja ću samo da se osvrnem na period koji se odnosi na javnu raspravu, odnosno onaj koji je prošao, od usvajanja nacрта pa do ovog prijedloga. Da kažem da je na web stranici Općine Gračanica bio objavljen nacrt ovog Pravilnika. Uz njega je bila objavljena Odluka Općinskog vijeća kao i zakon koji je osnov za donošenje ovog Pravilnika. Svi oni koji su se obratili službi ili Stručnoj službi Vijeća ili Službi za prostorno uređenje, dostavljeni su im Pravilnici, ako je neko tražio ova dokumenta. Takođe, moram reći da u toku trajanja javne rasprave, nije došla ni jedna pismena primjedba ni e-mailom, niti poštom u Stručnu službu Općinskog vijeća ni u službu. Zatim, održana je javna rasprava, a njen termin je bio objavljen i na sredstvima javnog informisanja i na web stranici Općine Gračanica i niko se nije pojavio na javnoj raspravi. Dakle, već piše u obrazloženju primjedbe Osmana Sulejmanovića koje su iznesene na Vijeću kada je razmatran nacrt Pravilnika unesene su u prijedlog vezano za konkretan član Pravilnika.

Za diskusiju se javio Nihad Krajinović i iznio slijedeće:

„Na početku ove tačke želim da se zahvalim prije svega službi, na prijedlogu Pravilnika o uslovima za obavljanje poslova upravitelja na području općine Gračanica, tema koja već niz godina zaokuplja pažnju stanara kolektivnih stanovanja. A iskreno, ujedno izražavam žaljenje što se niko od stanara, nekoliko stambenih zgrada, odnosno naselja na području grada a i općine jer ima zgrada i na području MZ-a nije odazvao i nije uključio u javnu raspravu da pomogne u izradi ovog Pravilnika o uslovima za obavljanje poslova upravitelja. To možda ima i drugu svoju stranu, da je Pravilnik dobro urađen, da su ljudi dobro pregledali i da nemaju nikakvu primjedbu na njega, ali to sad ostaje misterija. S ove govornice koristim priliku, obzirom da sam već nekoliko godina uključen i od strane građana a i lično sam zainteresovan za ovu temu jer takođe živim u kolektivnoj zgradi, pozivam stanare da se zaista uozbilje jer dosta ima posla oko uređenja zajedničkih prostorija i održavanja zgrada uopšte. Da se uključe da svi oni koji nemaju upravitelje, shvate ovo ozbiljno, da se uključe u problematiku i u skorije vrijeme, čim Općina Gračanica raspiše konkurs i izabere neke od mogućih upravitelja i one koji će vršiti poslove održavanja zgrada, dakle, da stanari izaberu svoje predstavnike etažnih vlasnika i da se uključe u ovaj proces održavanja zgrada kolektivnog stanovanja. Moramo shvatiti i mi koji živimo u takvim stambenim objektima, da nam država ne može održavati naš prostor u kome mi živimo. Šta bi onda rekli ljudi koji žive u individualnim objektima i svojim naravno svojim novcem i prave i održavaju stambene objekte i prostore oko njih. Ja sam već razgovarajući i sa svojim komšijama i sa prijateljima čak sam nailazio i na neke kritike što ovakav stav zauziman, ali zaista moramo shvatiti da je prošlo vrijeme socijalizma i da moramo sami preuzeti brigu o prostoru kojeg koristimo“.

Pravilnik o uslovima za obavljanje poslova upravitelja zgrada kolektivnog stanovanja s uputstvom o načinu promjene upravitelja je usvojen jednoglasno.

**TAČKA 6
DONOŠENJE RJEŠENJA O IMENOVANJU ČLANOVA NADZORNOG
ODBORA JP „KOMUS“ D.O.O. GRAČANICA**

Obrazloženje po ovoj tački dnevnog reda dao je Općinski načelnik Nusret Helić:

Vi ste uz prijedlog Rješenja dobili obrazloženje, a ja ću samo ponoviti neke stvari. Dakle, istekao je mandat i privremenom Nadzornom odboru JP „Komus“, raspisan je konkurs u skladu sa Odlukom Vijeća o kriterijima, postupcima, u skladu sa Zakonom o ministarskim, vladinim i drugim imenovanjima. U proceduri je formirana komisija, kako je to utvrđeno zakonom, čiji ste sastav vidjeli i čija je dužnost bila da obavi intervju i rangira one koji su prošli na javnom pozivu i koji nisu imali manjkavosti u dokumentaciji. Vidjeli ste da se radi o devet osoba koje su praktično prošle proceduru i vidjeli ste bodovanje. Interesantno je da je prva četvorka dobila isti broj bodova i vjerovatno su svi bili uspješni. I opredijelili smo se, kako je to zakon rekao prvi rangirani kandidat ide u procedure. Obzirom da je JP „KOMUS“ još uvijek sto postotno vlasništvo Općine i mi, odnosno Vijeće imenuje tri člana. Mi predlažemo da to budu Zumreta Kenjar, Ahmetašević Jasmina i Haris Čajić. Zumreta za predsjednika pošto ima položen i stručni ispit koji je obavezan, a za ove druge je u konkursu stajalo da su dužni u određenom periodu u skladu sa uredbom položiti stručni ispit. Da vam kažem i ovaj četvrti rangirani je imao isti broj bodova i on je bio član Nadzornog odbora, ali zbog nekih, tako da kažem propusta u radu nismo se opredijelili da predložimo njega. Evo ja predlažem Vijeću da usvoji ovo rješenje i da imenuje članove Nadzornog odbora, koji normalno Skupština „KOMUS“-a mora praktično verifikovati. Evo toliko“.

Učesnici u diskusiji su:

Mirsad Čamdžić:

„Klub Naša stranka DF, neće podržati imenovanja Nadzornih odbora „KOMUS“-a i Vodovoda u Gračanici. Smatramo da predložena rješenja samo potvrđuju opredijeljenost vladajuće koalicije SDA i SDP da partijske interese ponovo stavljaju ispred interesa lokalne zajednice, odbacujući kompetentnost a favorizirajući stranačku pripadnost. Po našem mišljenju konkursa nije data potrebna transparentnost. Nije objavljen na internet stranici Općine, konkurs nije objavljen na lokalnom radiju. Konkurs nije prenošen ni dijeljen na društvenim mrežama. Rezultat toga jesu isti kandidati koji su se prijavljivali i u Vodovod i u Komus. Promakla je jedna greška Zumreta Kenjar koja je po komisiji imenovana kao prva za Komus, na Vodovodu nije uopšte stavljena na rang listu, mada u obrazloženju ne piše da joj je odbijena dokumentacija, što je ovako jedna nejasnoća, a moguće i da je neka greška. Ovo da je sve ovo u redu i da nema nikakve sumnje, ono što komisiju prema našem mišljenju čini uvjerljivom jesu ocjene kandidata. Uz dužno poštovanje u Komus predloženih troje članova SDP-a, na peto mjesto komisija je bodovala, postavila i samim time eliminisala magistricu hortikulture i bivšu direktoricu Zakiru Đogić, vrhunsku stručnjakinju koja je uspješno vodila ovo komunalno preduzeće kao što to danas čini Senad Memić. Po svemu sudeći Vodovod na osnovu predloženog sastava Nadzornog odbora, pripada SDA-u. I površan poznavalac vidi da su ova dva preduzeća stranački podijeljena kako bi koalicija nastavila funkcionisati. Klub Naša stranka-DF bit će „PROTIV“ ovakvog imenovanja. Hvala“.

Edin Ibrišević:

„Komentarisaću odmah, diskusija će biti vezana i za narednu tačku dnevnog reda, da se ne bi ponavljali. Klub vijećnika Nezavisni blok, smatra da su ključni dokumenti jedne koalicije, odnosno parlamentarne većine, budžet Općine Gračanica koji se donosi jedanput godišnje i imenovanje upravnih i nadzornih odbora, odnosno upravljačkih struktura u javnim preduzećima. Smatramo da odgovornost za ovo imenovanje treba da preuzme parlamentarna većina u Općinskom vijeću. Mi ćemo kao konstruktivna opozicija nastojati i

dalje da svojim prijedlozima i pojedinim rješenjima unaprijedimo rad parlamentarne većine a koliko će to parlamentarna većina uvažiti, to je do vas. Naravno nismo protiv ključnih projekata, glasali smo za ovu Odluku o općinskim priznanjima ali smatramo da ovakve jedne odluke treba da donesu parlamentarna većina te ćemo po ovoj tački dnevnog reda i narednoj Klub vijećnika Nezavisni blok, biti „SUZDRŽANI“.

Edin Šehić:

„Moja diskusija će se nastaviti na diskusiju kolege Čamdžića. U suštini, dakle radi se o istim licima koja su konkurisala po osnovu oba javna poziva. Nezgodna je situacija da neki ljudi koji su u toku zaista za jednu poziciju za jedan upravni odbor, nadzorni odbor, tamo su, čak ih nema nikako imaju mizernu kvotu broj bodova iako se radi o veoma sličnim institucijama i zna se šta radi nadzorni odnosno upravni odbor. Takođe, ono što je i meni zasmetalo a poznajem Zakiru lično, da nije dobila veći broj bodova i da stvar bude malo još zamućena jeste ova četiri imena koja su poredana po 123 boda. Zašto mora biti na ovaj način poredano a ne drugačije obzirom da svi imaju isti broj bodova. Tako zbog svih ovih stvari koje su kolege jednim dijelom navele i na neki način zbog nejasnoća i lično poznavanje ovih osoba koje su stavljene kao visokorangirane za nadzorne odbore, Klub Stranke za BiH će biti suzdržan po obje odluke“.

Općinski načelnik je obrazložio slijedeće:

„Uvijek će biti sumnja na ovim imenovanjima, a ja kao predlagač i ozbiljan čovjek i komisija koja je radila gdje su ljudi stručni i vodili računa o odredbama zakona, hoću da vam kažem, da znate dva najuspješnija preduzeća i dosad su bila i bit će ako ne u državi jest sigurno u Federaciji BiH, JP „Komus“ i JP „Vodovod“. U to se uvjerite. Dragi Čamdžiću sve ovo što si rekao da nije objavljeno, objavljeno je u svim mogućim. Najtransparentniji način i vidite listu ko je konkurisao. I sada da vam kažem, spominjete Zakiru, ja nikad neću predložiti uposlenika iz firme Komus, da bude i u Nadzornom odboru. To je van pameti, a tvrdim vam da je, odavde su izabrani ispred osnivača najuspješniji ljudi u preduzeću koja dobro funkcionišu. Bit će priča, a kakva parlamentarna većina? Ja ne vidim ovdje parlamentarnu većinu. Ako vi vidite, mi ovdje radimo svi. Možete se smijati, možda je smiješno, mi ovdje radimo i dok sam ja pokušavat ćemo zajednički da funkcionišemo i dogovaramo. Na ovim pitanjima će uvijek biti onih koji kažu, nije neko moj. Garantujem vam, a ozbiljan sam iza mene imaju određeni rezultati, ovo su najuspješniji kandidati sa ove liste. Razumijem i vas da nećete glasati. Evo javio sam se da kažem, znači uspješna preduzeća bila i ostala i uspješno vođena. Svi koji su se prijavili su neki stranački i do sada je bilo tako. Gdje ima neko da nije stranački, ali je bitno da su preduzeća uspješna i garantujem vam da će i nastaviti uspješno funkcionisati i uz ovaj Nadzorni odbor“.

Senahid Džebo:

„Vjerujte evo, da iz sjednice u sjednicu već mi je počelo smetati prozivanje koalicije, član sam SDA i evo pozivam javno i predsjednika Kluba SDA i predsjednika Kluba SDP-a da se ovdje izjasne, postoji li to ikakav dokumenat a da mi ne znamo kao vijećnici ili će se ovo i dalje nastaviti i ovakvo ne poštovanje. S druge strane hoću još nešto da kažem, prije formiranja ovog Vijeća vi ste gospoda iz Nezavisnog bloka iz nekih političkih partija, bili već odredili većinu, bili ste rasporedili ljude gdje će biti direktori, ko će biti direktor obdaništa ko će biti direktor svega. Ozbiljno pozivam da se jednom zvanično kaže je li postoji nekakav dokument ili ne postoji?“.

Rahim Gadžić:

„Ja kako znam Klub SDA nema nikakav protokol potpisan.Međutim, vi znate i u prošlom sazivu da je Klub SDA podržao sve nadzorne odbore bez obzira što su tad bili neki drugi ljudi.Vi znate da nikad nisu bili ljudi iz SDA a mi smo glasali za nadzorne odbore jer smo smatrali da sva javna preduzeća treba da rade i da im trebamo omogućiti normalno funkcionisanje.I evo vidimo da ta naša javna preduzeća imaju pozitivna poslovanja i da rade jako dobro.Je li to neko želi da ospori imenovanje nadzornih odbora što ta javna preduzeća dobro rade.Možda ne treba dati da rade konstruktivno, nego mi treba da zaustavimo, da blokiramo njihov rad.Klub SDA neće to uraditi, budite ubijedeni, bez obzira na imena koja se tamo nalaze.Mi ćemo biti spremni da podržimo u interesu svih građana Općine Gračanica da ta javna preduzeća i dalje rade normalno i da imaju svoje upravne i nadzorne odbore.A vi gospodo koji ste izlazili i protivite se, vratite se unazad pa vidite sastave upravnih i nadzornih odbora, bivših direktora i sigurno će vam biti mnogo jasnije i shvatit ćete da to što danas govorite pravite grešku jednu.Toliko“.

Edin Ibrišević:

„Želim da skrenem pažnju, pokušava nam se ovdje imputirati kako neko nije zadovoljan radom.Vratit ćemo se unazad pa ćete vidjeti da je taj klub vijećnika Nezavisni blok, usvojio, digao ruku i glasao za Izvještaj o radu Komusa i Izvještaj o radu Vodovoda. Nemojte da brčete babe i žabe.Što se tiče potpisivanja nekog papira zvaničnog nekog dokumenta, svi mi koji smo u politici znamo vrlo dobro da nije potrebno i da se broje ruke i da iz sjednice u sjednicu parlamentarnu većinu čine ruke. Ja nisam spomenuo ni jednu stranku ovdje, niti sam rekao ova ili ona stranka, u svojoj diskusiji čini parlamentarnu većinu, nego grupa koja se osjeća tako nek usvoji to i ne vidim u čemu je sad tu problem prozivanja.Mi smo u prošlom sazivu Vijeća bili u parlamentarnoj većini, stajali iza toga, nismo se stidili radili smo kako smo radili, o tome imaju određene ocjene i prema tome ne vidim čemu bojazan od toga“.

Adem Alijć:

„Mene zaista žulja, ja nisam na kraju tu da kažem, ne govorim u boksterskim rukavicama ali ovo više nije misteriozna koalicija. Naime mi smo radili u nekoj koaliciji, ali bilo je razloga i preovladali su neki lični interesi.Na kraju krajeva moja inicijativa na kraju je da nastavite i dalje da budete u toj koaliciji, pometite ove ostale marginalne političke partije.Zaista najiskrenije govorim“.

Vahidin Smajlović:

„Pa evo mi ćemo ove priče o koaliciji ovakvoj ili onakvoj slušati sve više jer idu izbori.Ono što zaista želim da vam kažem ovdje, zaista mi nemamo nikakav pisani dokumenat o tome ni sa jednom političkom partijom.SDP je pokušao napraviti zvaničnu pisanu koaliciju, oni koji to nisu htjeli, sada su najveći pobornici toga da oni sad kažu da ima neka koalicija.Od svega je najbitnije, mislim kolegice i kolege da ovo Vijeće u ovom sazivu radi i funkcioniše.Da se bitne odluke donose za interes svih građana općine Gračanica.A ja vjerujem i to je neminovno to će biti sada hrana ovim koji sebe sada nazivaju opozicijom, da kažu kako koalicija ova nešto usvaja i donosi.Ja vjerujem vezano za ove odluke oko ovih nadzornih odbora veliku odgovornost snosi ova komisija koja je rangirala te ljude.Ne sumnjam uopšte da su radili nešto mimo propisa, mimo zakona.Odabrali su ljude koji su ispunili uslove i koji su najbolji i ne vidim razlog da oko toga dižemo neku veliku polemiku.Smatram da treba da usvojimo ovu Odluku i da ova naša preduzeća nastave svoj uspješan rad.Znači to Klub SDP-a će sigurno podržati ovu odluku, a evo ostali ako misle da ne treba to je njihova volja.Hvala“.

Mirsad Čamdžić:

„Dakle, Naša stranka mora radi javnosti reći da u novom sazivu javno se izjasnila i o tome a poznato je i na društvenim mrežama, odnosno zbor u kojem smo donijeli Odluku na osnovu stavova našeg članstva u sali da ne idemo u vlast i to nismo ni tražili to zna i načelnik. Ono što želim reći, što se tiče koalicije, 7 % Amerikanaca vjeruje da smeđe krave daju čokoladno mlijeko. Imaju pravo da vjeruju. Tako i ovdje, ono što želim poručiti kolegicama i kolegama koji s ovim tvrdnjama zaista, ne želim biti grub, vrijeđaju inteligenciju, nemojte biti spavači jer najteže je probuditi čovjeka koji se pravi da spava“.

Zaključena je rasprava i na prijedlog predsjednika Kluba SDP-a data je pauza u trajanju od deset minuta.

Nakon pauze, a uz prisustvo 28 članova Vijeća prešlo se na glasanje.

„ZA“ Rješenje o imenovanju članova nadzornog odbora JP „Komus“ d.o.o. Gračanica glasalo je 16 članova Vijeća, 4 „PROTIV“ i 8 „SUZDRŽANO“.

Predsjedavajući je konstatovao da je Rješenje usvojeno.

TAČKA 7 DONOŠENJE RJEŠENJA O IMENOVANJU ČLANOVA NADZORNOG ODBORA JP „VODOVOD I KANALIZACIJA“ D.O.O. GRAČANICA

Kratko obrazloženje dao je Općinski načelnik Nusret Helić:

„Samo da kažem da je ovdje druga situacija. U skladu sa Statutom preduzeća, osnivač daje dva člana u Nadzorni odbor JP „Vodovod i kanalizacija“ a Skupština bira jednog člana. Dakle, predložena su dva člana koja su prošla u proceduri koja je bila ista kao i za JP „Komus“. Od svih kandidata jedan je već bio uspješan član Nadzornog odbora Vodovoda. To je ovaj predsjednik. Rezultati koje Vodovod ostvaruje potvrđuje da su u tome učestvovali svi članovi odbora i to se odnosi i na preduzeće Komus, što Edo kaže, uspješno, glasali smo za Izvještaj o radu, a dio rada preduzeća je Upravni odbor koji rukovodi radom preduzeća“.

Nije bilo učesnika u diskusiji i Rješenje o imenovanju članova Nadzornog odbora JP „Vodovod i kanalizacija“ d.o.o. Gračanica je usvojeno sa 16 glasova „ZA“, 4 „PROTIV“ i 8 „SUZDRŽANO“.

TAČKA 8 RJEŠENJE O RAZRJEŠENJU PREDSJEDNIKA STALNOG RADNOG TIJELA OPĆINSKOG VIJEĆA GRAČANICA, KOMISIJA ZA POLJOPRIVREDU.

Nije bilo učesnika u diskusiji i Rješenje o razrješenju predsjednika stalnog radnog tijela Općinskog vijeća Gračanica, Komisija za poljoprivredu je usvojeno sa 27 glasova „ZA“ i 1 „SUZDRŽAN“.

TAČKA 9 RJEŠENJE O IMENOVANJU PREDSJEDNIKA STALNOG RADNOG TIJELA OPĆINSKOG VIJEĆA GRAČANICA, KOMISIJE ZA POLJOPRIVREDU.

Nije bilo učesnika u diskusiji i Rješenje o imenovanju predsjednika stalnog radnog tijela Općinskog vijeća Gračanica, Komisije za poljoprivredu je usvojeno sa 26 glasova „ZA“ i 2 „SUZDRŽANO“.

TAČKA 10

RAZMATRANJE PRIJEDLOGA UGOVORA O REALIZACIJI PROGRAMA RESURSNOG CENTRA ZA DJECU, MLADE I PORODICE I DAVANJE SAGLASNOSTI ZA POTPISIVANJE ISTOG

Obrazloženje je dao Općinski načelnik Nusret Helić:

„Poznato vam je da je prostor o kojem je riječ u ovom Projektu i ugovoru prostor BKC-a koje je koristilo Udruženje mladih ANEA iz Gračanice, takođe za potrebe mladih. Uvijek se postavljalo tokom korištenja pitanje je li prostor dovoljno iskorišten i da li se može kvalitetnije koristiti kako obezbijediti način saniranja i održavanja ne odstupajući od projekta da to ostane u funkciji i za potrebe mladih.

Mi Već duži period Općina saradjujemo sa mnogim projektima sa našim SOS Dječijim selom iste provodimo u neuslovnim prostorima. Tražili smo rješenje evo nakon dužeg vremena i procedura i u SOS Dječijem selu i u Općini došli do prijedloga da se prostor BKC-a na 10 godina ustupi SOS Dječijem selu za potrebe Resursnog centra za djecu, mlade i porodice“ općine Gračanica. Ovaj projekat je zasnovan i na Strategiji razvoja naše općine i u skladu sa sektorskim ciljevima društvenog razvoja

- unaprijeđen sektor socijalne i zdravstvene zaštite,
- poboljšani uslovi za rad i povećana obuhvatnost djece u obrazovnim ustanovama.

Šta je cilj projekta: Rečeno je u članu 1 ugovora pa prava i obaveze su utvrđeni u članu 3 za SOS Dječije selo, u članu 4 Općine i radi se o jednom širokom krugu obuhvata i aktivnosti za mlade od pružanja usluga, podrške, obrazovanja, edukacije i savjetovanja, sticanja životnih i ekonomskih vještina pa do obezbjeđenja prostora za aktivnosti krovne organizacije Vijeća mladih općine Gračanica i pružanja edukacija i stručnog osposobljavanja za rad sa djecom i mladim.

Dakle, čitav sadržaj Centra je u funkciji mladih, što i jest bio naš stav od početka. I ono što jest najvažnije SOS Selo ima ljude, kadrove i kapacitete da ovo postane najbolji projekat ove vrste na ovom prostoru, a mi pokažemo odgovornost i na ovaj način prema problemima mladih, djece i porodice. Vidjeli ste i u nacrtu Ugovora koje su naše obaveze. Dakle u ovaj prostor će se uložiti znatna sredstva. Urađen je i projekat i normalno zajednički održavamo po 50 % ovaj prostor, a i do sad smo održavali.

Predlažem da Vijeće da ovlaštenje načelniku da potpiše ovaj ugovor i započnemo njegovu realizaciju. O realizaciji Vijeće će biti informisano, što je i obaveza iz Ugovora“.

Učesnici u diskusiji su:

Puškar Hasan je iznio stav Komisije za propise i Statut:

„Komisija je na svojoj sjednici razmatrala pomenuti Ugovor i dala je jednu sugestiju. Da se u Ugovor ubaci novi stav odnosno da se ubace odredbe o načinu raskida ugovora, ukoliko neko želi da raskine ugovor. U ovom ugovoru takva odredba ne postoji“.

Edin Šehić:

„Evo mogu slobodno reći da sam bio jedan od aktivnih sudionika čitavog puta i procesa koji je trajao od same inicijative da se ustupi prostor Vijeću mladih općine Gračanica. Možda na prvoj sjednici u ovom sazivu. I u samim pregovorima sam lično i u delegaciji općine prisustvovao pregovorima a takvom centru u Sarajevu koji perfektno funkcioniše. Ja čestitam Općinskom načelniku i čestitam svakako svima onima koji su dali doprinos da dođe

ova forma ugovora i da SOS potpiše zaista jedan tako kvalitetan ugovor. Prije svega što ćemo imati podršku u tim kategorijama na općini Gračanica posebno mladima. A drugo da se taj prostor zaista iskoristi maksimalno onako kako može biti od koristi svima a posebno mladima. Još jednom čestitam načelniku i svima koji su radili na pripremanju i realizaciji ovoga uz malu sugestiju, kad bude gotov projekat da se informiše Općinsko vijeće, koliko u suštini košta taj projekat jer 70 % preuzima obavezu SOS Selo, a 30 % Općina Gračanica. Samo da znamo koji je iznos na teret Općinskog vijeća. Čestitke i svakako Klub stranke za BiH će podržati i dati saglasnost“.

Demir Milkić:

Ovo je svakako za mene lično i za mlade našeg grada jedan od boljih projekata koji može ponuditi opštinska uprava, pratim već duže ovu priču i eto nakon dvije godine razgovora i pregovora konačno da idemo u realizaciju ovog projekta tj. Gračanica će dobiti svoj Yes centar.

Sos Dječija sela BiH kroz aktivnosti programa za mlade žele doprinijeti adekvatnom zapošljavanju mladih žena i muškaraca kroz poboljšanje opšte socio-ekonomske situacije marginaliziranih mladih u BiH.

Mi u SDP podržavamo, te se nadamo da ćemo u skorije vrijeme imati i svečano otvaranje Yes centra“.

Predsjedavajući Vijeća je zaključio raspravu i definisao zaključak koji glasi:

„Daje se saglasnost Općinskom načelniku Gračanica da u ime Općine Gračanica može potpisati Ugovor o realizaciji Programa Resursnog centra za djecu, mlade i porodice Općine Gračanica s „SOS KINDERDORF – International“ Predstavništvo u Bosni i Hercegovini, SOS Dječija sela Bosna i Hercegovina. Uz zaključak da se u Ugovoru predvide i odredbe o raskidu ugovora“.

Zaključak je usvojen jednoglasno.

TAČKA 11

RAZMATRANJE I USVAJANJE IZVJEŠTAJA O RADU OPĆINSKOG PRAVOBRANILAŠTVA ZA 2017.GODINU

Učesnici u diskusiji su:

Šehić Edin:

„Evo ja ću prije svega pohvaliti Izvještaj koji je zaista i obilan i sadržajan sa izrečenim svim detaljima sa kojima treba biti upoznato Općinsko vijeće. Ja ću imati samo dva pitanja. Po kom osnovu odnosno evidentirana su preko pola miliona KM procesi po osnovu potraživanja zaposlenih. Dakle, ovi zaposleni koji trenutno rade, pretpostavljam, da su neki možda i u penziji. Vidimo da je to već na drugostepenim komisijama, na drugostepenim presudama. Procesu su još u toku, da li Općinsko vijeće mora rezervirati sredstva ukoliko dođe do eventualne naplate tih potraživanja?“

I drugo pitanje je da li je Općinsko pravobranilaštvo nadležno vezano za imovinu MZ-a? Znae kakav smo imali Izvještaj sa svim neuknjiženim nepokretnostima, znači imovinom. Da li može tu nešto dati smjernice i pomoći vijećima MZ-a da se ta imovina uknjiži na MZ-e?“

Ibrahim Hasić:

„U ime Kluba SDP-a. Klub je ovaj Izvještaj detaljno pregledao i razmatrao i po meni bilo kakav drugi komentar bi bio suvišan, osim jedino uputiti veliku pohvalu gospođi

pravobranioacu. Da je samo gotove stavke trebalo prepisati, ovdje je mnogo a kamoli statistiku prikazati SDP će podržati ovaj Izvještaj“.

Džemal Jukan:

„Klub stranke za BiH će podržati ovaj Izvještaj, a kolega Šehić je postavio dva pitanja. Ja bih se samo malo nadovezao isto i postavio jedno pitanje. Naime, ovdje kaže da Općinsko pravobranilaštvo vrši poslove pravne zaštite imovine, imovinskih interesa Općine Gračanica i njenih građana. Ono takođe vrši poslove pravne zaštite imovine i imovinskih interesa pravnih lica, koje po zakonu osniva Općina Gračanica ako je to aktom o osnivanju predviđeno. MZ osniva ovo Vijeće i znači ovo stoji da Općinsko pravobranilaštvo mora povesti računa i o tome. Ima dalje i u tekstu kako i na koji način. Ali pitanje glasi. Nije dokle se stiglo, bilo je puno vijećničkih inicijativa o registru općinske imovine na kompletnoj teritoriji općine Gračanica, znači u gradu pa po mjesnim zajednicama. Bilo je tamo da V MZ-a nisu ni znala da postoji zemljište, postoje nekretnine koje su u vlasništvu Općine. Mislim da po tom pitanju nemamo u Izvještaju ni šta se radi, ni eventualno šta se planira uraditi. Neke nekretnine u samom gradu kao npr. čitaonica Lipa, BKC i slično, je li to sve uknjiženo, kako treba biti uknjiženo da je vlasništvo općine Gračanica. I ako nije ima li neki plan da se imovina uknjiži? A sve govori da taj registar kao nešto što treba postojati i da ga treba uraditi“.

Senahid Džebo:

Klub SDA je razmatrao ovaj Izvještaj i podržat će ga. A ja bih evo u svoje lično ime iskoristio priliku obzirom da se ovdje nalazi i općinski pravobranilac i šefica službe. U narednom periodu je planirana harmonizacija, usklađivanje katastra i zemljišnih knjiga i tu je uračunata i MZ Stjepan Polje. I obzirom da postoje ta zemljišta koja se vode na MZ, koji je način usklađivanja i da li će Općinski pravobranilac preduzeti radnje kad se radi o imovini MZ-a?“

Odgovore na pitanja i sugestije dala je Jasminka Imširović Općinski pravobranilac.

Nakon toga Izvještaj o radu Općinskog pravobranilaštva za 2017. godinu usvojen je jednoglasno.

TAČKA 12

RAZMATRANJE I USVAJANJE IZVJEŠTAJA O PROVEDENIM PODSTICAJNIM MJERAMA I NJIHOVIM EFEKTIMA U POLJOPRIVREDI U 2017. GODINI NA PODRUČJU OPĆINE GRAČANICA.

Učesnici u diskusiji po ovoj tački dnevnog reda su:

Vahidin Smajlović je iznio stav Komisije za poljoprivredu:

„Komisija za poljoprivredu je održala sjednicu vezano za Izvještaj o provedenim podsticajnim mjerama u poljoprivredi i njihovim efektima u 2017. godini na području općine Gračanica i donijela slijedeći zaključak. Usvaja se naravno ovaj Izvještaj uz preporuku Vijeću da usvoji zaključke predložene u Izvještaju a to su:

Usvaja se Izvještaj o provedenim podsticajnim mjerama u poljoprivredi i njihovim efektima u 2017. godini na području općine Gračanica uz sljedeće zaključke:

- nastaviti sa izgradnjom sistema direktnih novčanih podrški iz Općinskog budžeta, ali uz značajno povećanje ulaganja u razvojne komponente, iskazane u podrškama investicijskim projektima i ruralnom razvoju,

- daljnjim razvojem sistema podrški u poljoprivrednoj proizvodnji i ruralnom razvoju preferirati robne proizvođače, odnosno one proizvođače koji značajnije proizvode i plasiraju svoje proizvode na tržište i kojima je to osnovna djelatnost,
- poticati razvoj prerađivačkih kapaciteta na općini,
- provoditi kontinuiranu edukaciju poljoprivrednih proizvođača, kako u pogledu primjene savremene tehnologije u primarnoj poljoprivrednoj proizvodnji, tako i u oblasti zakonske regulative, koja reguliše oblast novčanih podrški, kako bi korisnici blagovremeno, sa propisanom dokumentacijom mogli aplicirati za određene vrste podrški. Ovo je naročito bitno u oblasti investicijskih projekta i ruralnog razvoja, s obzirom da nam i legislativa EU iz oblasti poljoprivrede u narednom periodu nameće sve veća ulaganja u ove oblasti,
- ubrzati aktivnosti na izgradnji protivgradne zaštite na području općine Gračanica.

Evo to je dakle stav Komisije za poljoprivredu, a iskoristio bih izlazak da kažem da Klub SDP-a je takođe razmatrao ovaj Izvještaj o provedenim podsticajnim mjerama u poljoprivredi na području općine Gračanica i naravno prihvatit će ovaj Izvještaj. Ono što bi htjeli da naglasimo ovdje, znači vezano za ovaj Izvještaj ukoliko ste pratili, vidjeli ste tamo da i u ovoj godini na žalost na općini Gračanica je došlo oko stodeset hiljada KM manje za podsticaje naših poljoprivrednika i poljoprivrednih proizvođača u odnosu na prošlu godinu. A mi kao Općina izdvajamo 50.000 KM, onda možete misliti da je veliki iznos manji a problem je na žalost što iz godine u godinu taj iznos podsticaja za poljoprivredne proizvođače je sve manji i manji. Ako ste tamo malo pogledali, vidjeli ste da imamo sve manje zahtjeva, znači poljoprivrednih proizvođača biljne proizvodnje koji sve manje podnose zahtjeve. Šta to znači? Znači da sve manje sijemo, sve manje obrađujemo zemlju, da oreimo da tako kažem, a na žalost bazirali smo se sve više na uvoz. Imamo relativno dobro razvijenu animalnu proizvodnju na području općine Gračanica, ali dovodimo do pitanja, čime ćemo da hranimo tu stoku. Nemamo tamo nikakvih podsticaja, nemamo aplikacija. Znači jednostavno ljudi ne nalaze tu sebe. Nemamo za sadni materijal, nemamo za sjemenja. Izgleda, jednostavno bazirani smo na žalost, to nije naravno samo naš problem, to je problem generalno države, bazirani smo na uvoz. I sve više prevladava ono, jeftinije uvozno, a ove naše usitnjene parcele sve manje se obrađuju i bojim se ako se nastavi ovakva politika da će se one tu sve manje i manje obrađivati. Naravno, o tome treba da vode računa više instance vlasti, ministarstva, ali moramo zaista i mi ovdje kao općinski vijećnici da o tome i razmatramo jer pošli smo da uvozimo sve, a postavlja se pitanje i šta uvozimo i kakav je kvalitet tih proizvoda koje mi uvozimo. Ja ovdje evo apelujem i u ime komisije i u svoje lično ime, da mi za iduću godinu pokušamo da u budžetu Općine Gračanica, obezbijedimo veća sredstva za podsticaj poljoprivrednim proizvođačima, inače sve gotovo, što jedemo i pijemo 70-80 % će nam biti iz uvoza. Toliko i hvala“.

Gadžić Rahim:

„Klub SDA je takođe razmatrao Izvještaj o podsticajnim mjerama u poljoprivredi i njenim efektima u 2017. godini na području općine Gračanica. Mi ćemo takođe podržati ovaj Izvještaj. Smatramo da služba i šefica Nermina Trutović u službi obavlja jako dobro posao, jer znamo da su poljoprivredni proizvođači jako zadovoljni uslugama koje se pružaju u šalterskoj sali Općine. Žao nam je kad vidimo da se podsticaj Općini Gračanica za poljoprivredu smanjio. Smanjio se, a vidimo da se sve više i više imanja napuštaju i sve manje ljudi se bavi poljoprivrednom proizvodnjom. To je signal i nama kao Opštinskim vijećnicima da se nešto dešava na području općine Gračanica kad je riječ o poljoprivredi. Mi imamo podsticaj iz općinskog budžeta koji je ove godine 50.000 KM. Međutim vidimo da je to jako mali iznos sredstava. Mi treba svi zajedno sa Komisijom za poljoprivredu, za koju se nadam da će u narednom periodu izraditi Pravilnik za podsticaje u narednoj godini. Taj Pravilnik prilagoditi poljoprivrednim proizvođačima koji žive od tog teškog posla. To je jako težak posao i mi kao vijećnici treba da vidimo, da nam neko predloži neke mjere koje možemo mi da pomognemo tim ljudima, da ljudima koji se još bave poljoprivrednom proizvodnjom da opstanu. Vidimo svaki dan da se sve manje ljudi opredjeljuje da se bavi tim poslom i samim tim odlaze iz BiH

godinama se priča da je naša budućnost u poljoprivrednoj proizvodnji ali se ništa konkretno na terenu ne dešava. Žalosno je što se ništa ne dešava. Mi kao ljudi odgovorni, ovdje koji smo treba da nas neko posavjetuje šta mi možemo na tom polju pomoći. Sve što bude do nas mi ćemo se u svakom slučaju opredijeliti da pomognemo našim poljoprivrednim proizvođačima. Izvještaj kao Izvještaj, to je tabelarni prikaz šta su naši poljoprivredni proizvođači dobili u proteklom periodu. Ja se zahvaljujem svima onima koji su pomogli našim proizvođačima da bilo šta dobiju kao pomoć u jako teškom poslu. Zahvaljujem se ponovo službi i nadam se da će i u narednom periodu ostati i tako raditi kako bi naši poljoprivrednici bili što zadovoljniji uslugama koje služba pruža“.

Zaključena je rasprava i Predsjedavajući Vijeća je dao na izjašnjavanje Izvještaj uz zaključke koje je predložila Komisija za poljoprivredu isti je usvojen jednoglasno.

U nastavku sjednice, predsjedavajući Vijeća je dao na razmatranje zajedno tačku 13. Izvještaj o radu i finansijskom poslovanju sa bilansom stanja i uspjeha, JP „Komus“ d.o.o. Gračanica za 2017. godinu kao i tačku 15 Informacija o prikupljanju i odlaganju komunalnog otpada iz domaćinstava i privrednih subjekata.

Učesnici u diskusiji su:

Šakušić Ahmet:

„Klub SDP-a je razmatrao Izvještaj o radu i finansijskom poslovanju JP „Komus“ d.o.o. Gračanica za 2017. godinu i podržat će ovaj Izvještaj. Iz Izvještaja se vidi da JP „Komus“ d.o.o. Gračanica ostvaruje dobit iako su imali ulaganja u novo izgrađenu upravnu zgradu. Možemo vidjeti da su u 2017. godini povukli dosta sredstava iz fondova što je za svaku pohvalu. Uključene su i nove MZ u organizovani odvoz otpada s anekih novih hiljadu korisnika. I sve ovo su razlozi na kojim možemo samo čestitati rukovodstvu i radnicima JP „Komus“ na čelu sa direktorom“.

Ahmetović Halid:

„Evo i Klub SDA je razmatrao ovaj Izvještaj i isti će podržati. Ja u ime MZ Doborovci i lično u svoje ime želim da pohvalim rad „Komusa“ odkako smo korisnici usluga, vjerujte da nemamo ni jedne primjedbe od građana što znači da oni svoj posao rade odgovorno i dobro. Jedno što se nadam, da će i svijest onih građana koji nisu uključeni u ovaj projekat, proraditi da i oni krenu da koriste usluge, da ih mi ne natjerujemo i da ne plaćaju kazne i slično. Još jednom pohvale JP „Komus“ Gračanica“.

Rahim Gadžić:

„Kolega Halid je rekao stav Kluba SDA, a ja ću evo ipak reći nešto u svoje lično ime. Meni je posebno zadovoljstvo što je JP „Komus“ Gračanica proširilo svoju djelatnost i došlo na području MZ-a. Prijeko Brdo, Trnovci i Džakule. Više puta smo tražili da u odvoz smeća budu uključeni svi građani na području općine Gračanica. Mislim da su na području MZ Prijeko Brdo gotovo svi građani i ako ima neko da je ostao i nije se uključio, mi ćemo nastojati uticati na to, da pomognemo JP „Komus“ da svaki stanovnik plaća odvoz smeća jer ne postoji na području općine ni jedan stanovnik koji nema smeća. Znači odvoz treba da plaća svaki stanovnik bez obzira gdje živi. Hvala direktoru što si se proširio na sve. Hvala“.

Sjednicu je nastavio voditi zamjenik predsjedavajućeg Općinskog vijeća Gračanica Almedin Devedžić, a za diskusiju se javio:

Nihad Krajinović:

„Neće biti kritike prema preduzeću, nego uopšte prema građanima. Znam da ljudi vole kad im se obraćate, pričate ono što vole da čuju a ne zaista ono što je istina, ali i o tome trebamo progovoriti. Prije svega želim pohvaliti Izvještaj Komusa. Iscrpan je i ima dosta podataka koji mogu odgovoriti na neka pitanja, pa ću krenuti ovako. Nedopustivo je da u ekološkom stanju u kome se mi trenutno nalazimo, dakle bazirat ću se samo na općinu Gračanica i s mentalitetom i navikama. Dakle, imamo, odnosno posjedujemo da odvoz smeća postiže samo 70 procenta. Čuli smo evo iz diskusija kolega koji su pohvalili rad Komusa i njihovu angažovanost u ove aktivnosti, dakle nije problem u Komusu. Iz nekih mojih saznanja takođe znam da ima i MZ-a u kojima je uključenost slaba, a menadžment vodi aktivnosti, ali građani ne žele iz nekih svojih ličnih razloga da prihvate da odvoz smeća iz njihovih domaćinstava čini preduzeće koje to obavlja i pripada ovoj općini. Zato molim da se pojača aktivnost za uključivanje građana, uključujući sve potrebne resurse koji stoje na raspolaganju da se ovaj postotak poveća. Određen broj korisnika, ovdje u Izvještaju stoji koji nije u mogućnosti da plaća odvoz smeća, postoji način da se za njih putem mjera socijalne politike izvrši oslobađanje plaćanja i zbog toga pohvaljujem aktivnosti Komusa. Ono što želim pozvati Komus, jeste da u što skorije vrijeme izrade Plan uništavanja ambrozije. Prevencijom njene rasprostranjenosti uticati dakle na smanjenje koncentracija alergena koji sve više izazivaju zdravstvene probleme kod naših građana. Takođe, pozivam direktora Komusa da u narednom periodu izradi finansijski i Plan rada održavanja čistoća na ulicama i zelenim površinama angažovanjem lica sa Biroa za zapošljavanje. Evo da taj Plan bude gotov do perioda kada se već otvaraju teme oko budžeta za narednu godinu, pa da vidimo da li ima prostora i da općina finansijski pomogne, jer zaista ima potrebe. Koliko god radnici Komusa izlaze na ulice, ja sam evo svakodnevno svjedok da je ulica Sarajevska pa sve do naselja Javor, loše očišćena ili da se rijetko očisti. Razumijem angažovanost malog broja radnika koji ne mogu stići, ali nemojmo samo da čistimo dio regionalne ceste koja prolazi kroz Gračanicu i centralnu našu ulicu, ima i drugih ulica u II ili III zoni koje trebaju biti čiste. Pohvaljujem direktora i uposlenike Komusa jer se odazivaju na svaki poziv, kritiku, sugestiju i primjedbu građana. Imali smo i jedno pitanje odnosno inicijativu i na Vijeću, pa je odgovor stigao i molim direktora da danas da neke nove informacije, obzirom da stalno ima nedoumica i priča javnosti oko našeg centralnog odlagališta otpada. Šta je s njim, koji je kapacitet, kad će se to i da li uopšte ima potrebe da se zatvara i gdje ćemo dalje odlagati otpad i smeće? Toliko i hvala“.

Mirzet Topčagić:

„Ja bih u svoje lično ime pohvalio rad i finansijsko poslovanje Komusa za proteklu godinu i evo već se predsjedavajući dotakao procenta uključenosti u organizovan odvoz smeća. Ja predlažem, a u Izvještaju se i moglo vidjeti, navedeno je da postoji znači određena barijera u Zakonu o komunalnim djelatnostima TK. Znači član 17 koji je određena barijera automatski, uključivanja u korištenje usluge vlasnika svih poslovnih i stambenih prostora. Naime, ja predlažem da mi kao Općinsko vijeće podnesemo inicijativu Skupštini TK da se pristupi izmjeni ovog zakona, kako bi povećali broj uključenosti u organizovan odvoz smeća. Toliko“.

Hasić Ibrahim:

„Uredu je Izvještaj, takav je kakav je, ali bih ja jednu primjedbu mislim nije primjedba, nego sugestija. Naravno iz ugla Malešića gledano, da još ima prostora puno u Malešićima da se obuhvate građani sa odlaganjem smeća odnosno odvoza smeća od građana Malešića. Da vam kažem ja ne znam tačno koje to sredine, iz kojih sredina ljudi ne odlaze. Kad bih ja dobio informaciju koji su to ljudi koji nisu uključeni, ja bih reagovao ili putem inspekcije koja prihvata i odmah reaguje. Ponavljam uputio bih sugestiju direktoru Komusa da nam dostavi na određen način ako može po mahalama koji to ljudi ne odlaze odnosno odlazu

oni njega, sigurno na nedozvoljena mjesta, ja ću odavde sugerisati da toga ne bude, a to je i iz razloga što oni ljudi koji plaćaju odvoz budu često provocirani od ovih koji to ne rade. Pa da toga nebi bilo, molim da se dostave po mahalama imena i prezimena onih koji nisu uključeni kako bi pojačali procenat uključenosti u organizovan odvoz smeća“

Edin Šehić:

„Moram se složiti sa kolegom Hasićem. Mislim da ta transparentnost zaista mnogo znači i mi moramo kao savjesni građani dosta uticati da poboljšamo procenat uključenosti, jer kad vi nekoga javno prozovete i objavite nije baš ugodno. Ja sam takođe izašao da pohvalim ovaj Izvještaj, direktora i komplet rukovodstvo Komusa, jer je jedan od respektabilnih primjera javnog preduzeća u našem gradu i našoj općini. Jedna mala sugestija direktoru. Ukoliko se u određenim MZ-a odvoz otpada organizuje u danima praznika, ne bi bilo loše u roku dan-dva ili da se napravi plan prije praznika da obavijesti kad bude slao odreske za plaćanje da će biti pomjeren odvoz za taj i taj dan. Pogotovo u ljetnim danima kada imamo ogromne vrućine, zaista je neugodno ukoliko taj otpad bude pet-šest dana. I još jedno, obzirom da diskutujemo o dvije tačke dnevnog reda, do sad je bila praksa da se u MZ-a organizuje otpad odnosno organizovan odvoz krupnog otpada, koliko znam u ovoj godini nije bilo toga u MZ-a, pa evo da se pojasni zašto toga nije bilo i po MZ-a“.

Nije bilo više prijavljenih učesnika u diskusiji a na sva pitanja, primjedbe i sugestije, odgovore je dao direktor JP „Komus“ Gračanica Senad Memić, zahvaljujući se na pohvalama, prihvatajući sve sugestije, te naglašavajući aktivnosti koje će uslijediti od strane javnog preduzeća Komus, kako bi usluge preduzeća bile još kvalitetnije i efikasnije.

Izvještaj o radu i finansijskom poslovanju sa bilansom stanja i uspjeha, JP „Komus“ d.o.o. Gračanica za 2017. godinu je usvojen jednoglasno.

TAČKA 14

RAZMATRANJE I USVAJANJE INFORMACIJE O RADU I VRŠENJU NADZORA OPĆINSKE INSPEKCIJE ZA 2017. GODINU

U diskusiji su učestvovali:

Vahid Bajrić:

„O radu Općinske inspekcije ima onih koji nisu zadovoljni sa radom a šire ima onih koji su zadovoljni sa radom Općinske inspekcije.

Kada su u pitanju upravne i radnje koje su preduzimate od strane inspekcije Općine Gračanica prikazano da je ukupno u 2017. godini izvršeno 1.150 inspektorskih nadzora.

Zbog povrede propisa zakona na kojima su inspektori nadzor vršili doneseno je ukupno 242 rješenja za otklanjanje nepravilnosti i nedostataka, što je za 12,8 % više nego u prethodnom izvještaju.

Kada je u pitanju nadzor komunalnog inspektora za 2017. godinu, komunalni inspektori su donijeli 176 rješenja u odklanjanju nedostataka i nepravilnosti što je 9 % više nego u predhodnom izvještajnom periodu.

A najveći broj rješenja se odnosi na uključenje u organizovanom odvozu smeća.

Za ne postupanje po rješenju inspektora poduzimate su mjere donošenjem prekršajnog naloga gdje je u 2017. godini izdato 39 prekršajnih naloga.

Uposljenjem dva komunalna redara je dalo vidno poboljšanje stanja u komunalnoj djelatnosti, gdje je izvršeno 570 redovnih i vanrednih kontrola. Zato apel na građane da čuvaju i štite naš okoliš da prave saradnju sa nadležnim službama a neodgovorne građane prijave nadležnoj inspekciji.

Oblast nadzora građevinske inspekcije rezultati rada su u predhodnoj godini 424 nadzora. gdje su donešena odgovarajuća rješenja i izrečene odgovarajuće prekršajne mjere. Zaključak je da radni prostor i druge uslove treba poboljšati.

Izvršiti prijem potrebnog broja inspektora u oblasti (putni inspektor, sanitarni inspektor).

Animirati građane za veću saradnju sa inspekcijama i redarima sve u cilju poboljšanja stanja u komunalnoj oblasti na području općine.

Klub SDP-a će podržati ovakav izvještaj o radu i vršenju nadzora općinske inspekcije za 2017. godinu.“

Almedin Devedžić:

„Evo ja ću u ime Kluba SDA da iznesem osnovne konsultacije vezano za Informaciju o vršenju nadzora Općinske inspekcije za 2017. godinu. Ja sam u pripremi ove tačke podvukao određene stvari i htio sam pročitati ali evo kolega uglavnom pročita sve. Pa evo ako se ne ljutite ja bih u ime Kluba SDA podržao Klub SDP-a. Šalim se. Da se ne ponavljam stvarno to su brojke koje su impozantne i čitat ću samo ono što je Klub SDA htio da podrži posebno. A to su zaključci i prijedlozi mjera i naravno pozvati evo i načelnika da se te aktivnosti maksimalno podrže i naravno u interesu svih građana. Znamo svi da su inspekcije jedne od glavnih poluga društva, posebno lokalnih zajednica, gdje narod vidi mnoge nepravilnosti i onda se kaže šta imaju inspekcije. Međutim, problem je što građani ne prijavljuju. To je glavni problem, čeka da neko to drugi uradi. Evo i ovu priliku bih iskoristio da zamolim građane da sve nepravilnosti koje vide vezano i za komunalne i za građevinske prijave inspekciji koja ima u nadležnosti da interveniše.

Dakle ja bih htio u ime Kluba da podržim i mjere koje ova Informacija predlaže, odnosno zaključke:

-Da JP „Komus“ Gračanica u saradnji sa komunalnim inspektorima i komunalnim redarima i dalje nastavi aktivnosti oko uključivanja preostalih MZ-a u organizovani odvoz smeća.

-Da se na području općine Gračanica istraje u obezbjeđivanju sredstva za izgradnju i održavanje kanalizacionih mreža u cilju odvodnje otpadnih i oborinskih voda iz svih naseljenih mjesta.

-Animirati građane u cilju uspostavljanja veće saradnje sa inspekcijama i na nedozvoljena mjesta, a naročito se to odnosi na naselja gdje je organizovan odvoz smeća.

-Ponoviti postupak i izvršiti izbor pravnog lica shodno zakonu o javnim nabavkama BiH čije usluge će se koristiti za izvršenje rješenja građevinske inspekcije. To posebno naglašavam.

-Predvidjeti budžetom sredstva za uklanjanje divljih deponija.

-Provesti aktivnosti izbora Upravitelja zgrada u skladu sa zakonom.

-Nastaviti aktivnosti oko započetog uklanjanja bespravno postavljenih ekonomskih objekata u stambenim naseljima.

-Izvršiti prijem potrebnog broja inspektora, pogotovo u inspekcijama u kojima nemamo nikako ili nedovoljan broj istih (putni inspektor, sanitarni inspektor).

Evo pohvalio bih sve inspektore u inspektoratu, posebno njihovog šefa što je sigurno kriv zato što ovako na pravi način funkcioniše.

Želim Vam šefe puno uspjeha u budućem radu i nadam se da ćete tako nastaviti. Hvala“.

Senahid Džebo:

„Mi smo, čini mi se 17 ili 16 sjednica Općinskog vijeća, bila je uložena inicijativa za dostupnost komunalnog redara tokom 24 sata. Inicijativa je usvojena, ona je prošla, a mene interesuje samo u kojoj je to fazi? da li ćemo u narednom periodu imati dostupnost komunalnog redara, da li će to biti objavljeno javno? Koji je broj telefona i na koji način ćemo pozivati inspektore?“

Mirsad Čamdžić:

„Evo i mi se pridružujemo ovim pohvalama. U nekoliko navrata smo imali priliku pratiti rad inspekcije i pravovremeno djelovanje na uklanjanju divljih deponija što je bila inicijativa vijećnika Kluba Naše stranke-DF.I to evo koristim priliku da iznesem ovdje za govornicom i ovu Informaciju ćemo usvojiti, naravno Klub Naša stranka-DF“.

Edin Šehić:

„Pa i ja ću pohvaliti Informaciju svakako i rad inspeksijskih organa Općine Gračanica. Samo jedna molba, obzirom da je tu šef Službe za inspeksijski nadzor.Obzirom da sam prošlo Vijeće imao pitanje vezano za malo učestaliju kontrolu na izletištu Vis apelujem da to bude u danima vikenda da i samoinicijativno malo izađu gore kada je veći broj posjetilaca.A i ovo me takođe interesuje na poziv, ukoliko uočimo prekršioce, da li možemo prijaviti u bilo koje doba dana i noći da može neko od inspekcija izaći na teren.I još jednom apelujem svima obzirom da gore imamo jednu veliku divlju deponiju uz samu lovačku kuću, da pokušamo zajedno s Komusom iznaći rješenje da se ta deponija sanira.Ja ću sa svojim volonterima iz MZ biti na raspolaganju ako treba nešto pomoći.Hvala“.

Odgovore na pitanja i sugestije dao je Memić Muhibija, Džebo Senahid je pojasnio inicijativu ne izlazeći za govornicu.

Odgovor je dao Memić Muhibija.

Informacija o radu i vršenju nadzora općinske inspekcije za 2017.godinu je usvojena jednoglasno.

TAČKA 15 INFORMACIJA O PRIKUPLJANJU I ODLAGANJU KOMUNALNOG OTPADA IZ DOMAĆINSTAVA I PRIVREDNIH SUBJEKATA

Informacija o prikupljanju i odlaganju komunalnog otpada iz domaćinstava i privrednih subjekata je usvojena jednoglasno.

TAČKA 16 INFORMACIJA O ZBRINJAVANJU NAPUŠTENIH I IZGUBLJENIH ŽIVOTINJA (PASA LUTALICA) NA PODRUČJU OPĆINE GRAČANICA

Za diskusiju po ovoj tački dnevnog reda javio se Džemal Jukan i iznio slijedeće:

„Evo mi imamo Informaciju o zbrinjavanju napuštenih i izgubljenih životinja na području općine Gračanica. Ja mogu konstatovat samo da je ovo dio Informacije, odnosno dio problema.Problem o zbrinjavanju pasa lotalica puno širi, veći, kompleksniji od ovog kako je to napisano.Na kraju i ova jedna konstatacija gdje se kaže, možemo konstatovati da naša općina nema problema sa psima lotalicama.Mislím da je ovo malo preambiciozno napisano, obzirom, ako se sjetimo unazad koje štete su proizveli psi lotalice mještanima opštine Gračanica, od emisije „Dobro jutro načelnice“, koliko zovu iz MZ-a i traže, što znači da ipak problem postoji, nije da ga nemamo.Naravno Veterinarska stanica u sklopu svojih mogućnosti kapaciteta to fantastično radi.Ali evo, ja pitam, doduše čini mi se ovdje je inspektor glavni, na općini Gračanica postoji još jedan azil za pse ja bih pitao evo i inspektora, da li znaju? Vjerovatno ne zna niko i nije predmet u Izvještaju naravno.Postoji on, postoji MZ Lohinja, Pribava to je tamo.Vjerovatno na neki način to je, neću reći unosan posao, znam da se mogu

dobiti sredstva za to. Finansiraju ovi fondovi i vjerovatno je neko došao na ideju da to otvori. Tamo ima pasa od prilike isto toliko koliko ima u Veterinarskoj. Sad ja samo postavljam pitanje ko je dao dozvole, da li ide veterinarski nadzor nad tim psima tamo? Da li se životinja muči, jer je tamo smještena da bi bila zaštićena itd.? Ali dok ne znamo za to i nemamo registrovano, vjerovatno, neću da sumnjam, neko je iskoristio to da neke pare iz fondova povuče i da to ima i oformi. Mislim da na tom programu, projektu treba i naša Veterinarska stanica da aplicira, učestvuje jer je to nešto što je problem širi od opštine Gračanica. I mislim da se za te projekte mogu dobiti određena sredstva. I opet kažem u ovaj problem rješavanja, najviše su na opštini uključeni lovci. I evo i Općinsko vijeće i Općinski načelnik su tu stavku stavili u budžet. I mislim da se tu puno i ne priča i ne govori ali najveći dio problema se rješava, trajno i to na taj način. Hoću samo da kažem da je ovo pitanje puno šire od ove Informacije koju trenutno imamo. Mi ćemo prihvatiti ovu Informaciju“.

Nije bilo više prijavljenih učesnika u diskusiji i Informacija o zbrinjavanju napuštenih i izgubljenih životinja (pasa lualica) na području općine Gračanica je usvojena jednoglasno.

Predsjedavajući Vijeća je upoznao vijećnike da je na konsultacijama Kolegija Vijeća dogovoreno da naredna sjednica Općinskog vijeća najvjerovatnije bude 21. Juna 2018. godine.

Zbog toga je zamolio vijećnike da usaglase svoje termine oko godišnjih odmora ili nekih drugih obaveza, a i Općinski načelnik i šefovi službi za upravu da znaju zbog pripreme materijala koji će se razmatrati.

Materijali će biti dostavljeni u nešto kraćem roku.

I druga informacija za vijećnike je:

„Obzirom da je dan Općine 2. Juna u subotu, kada je predviđena i Svečana akademija neophodno je da se svi vijećnici odazovu i prisustvuju akademiji“.

Završena je 19. Sjednica u 13,20 sati.

ZAPISNIK VODILA:

Mevlida Naimkadić

**PREDSJEDAVAJUĆI
OPĆINSKOG VIJEĆA
Nihad Krajinović**